

Giuventetgna da Ruschein cun interessantas professiuns

■ (cp) El center dalla proxima sentu-pada «da cuminonza a Ruschein – la sera dils treis» stattan **Stefan Cavegn e Simona Giger, duas personas giuvnas ch'ei carschidas si a Ruschein**. Ellas raquantan da lur mintgagi professiunal. Tgi che vul saver pli concret tgei che «eventmanagement» cumpeglia tut e tgei ch'ei manegiau cun «fotogrammetria», lez vegn a saver dapli ussa gievgia sera, ils 3 da matg.

Il mund ei semidaus. Era per quels e quellas da Ruschein. Avon zacons decennis dev'ei portas professiunalas che sesarvevan mo vess per personas giuvnas dad in vitg muntagnard. Oz ha era la giuventetgna dalla periferia praticamein tuttas schanzas dad eleger quella activitad professiunala che plei. Per ordinari ei quei cumbinai cun luvrar e viver en in liug ordeifer. Mo la fin d'jamna tuorna bia giuventetgna el vitg nativ. Sch'ins fagess in inventari savess ins mo surstar dalla gronda diversitad dad occupaziuns professiunalas che giuvens e giuvnas dils vitgs han oz. Ina dallas finamiras dalla gruppa «da cuminonza a Ruschein» ei da promover il contact denter las generaziuns – pia era da laschar vegnir a plaid carstgauns giuvens, p. ex. en connex cun lur lavur, dalla quala ins sa savens pauc el vitg.

Stefan Cavegn

Quei che *Stefan Cavegn* fa tut concret en siu mintgagi professiunal ei gnanc aschi sempel da declarar e da capir. Actualmein



Simona Giger.

FOTOS MAD



Stefan Cavegn.

eis el vi da finir sia dissertaziun all'Universitad da Stuttgart, in doctorat ch'ha da far cun fotogrammetria. Mobile Mapping ed Image-Based Georeferencing – quei ein noziuns che tucan tier sia lavur. Sia via professiunala ha el entschiet avon 17 onns cun in emprendissadi da geomaticher. El vegn a raquintar co sia motivaziun per studegiar vinavon ei carschida. Ed el vegn a tradir tgei cumpetenzas e qualitads e tgei engaschi ch'ei drova per daventar in specialist per tecnicas da mesiraziun da 3D.

Simona Giger

Simona Giger ei ida sunter il gimnasi e la matura igl'emprein inaga per 13 meins en ils Stadis Uni dall'America sco au-pair tier ina famiglia. Lu ha ella studegiu psicologia en Svizra e pli tard ha ella luvrau el Congress Centre Kursaal Interlaken. High heels s'udevan leu tier siu outfit da mintga gi, e la buna etichetta era da grond'impurtonza el contact cun la clientella. Oz sa ella ir a luvrar en sneakers. Ella organisescha events da sport e cultura tier Davos Klosters Tourismus. En sia lavur dad eventmanagement tegn ella ina massa fils entamaun ed ella ei scheffa dad ina roscha personas. Ella raquenta tgei domenas che quels fils colligian tut e danunder ch'ella pren siu anim.

«Cun engaschi ed anim!» Hosps: **Simona Giger e Stefan Cavegn**. Gievgia, ils 3 da matg 2018 allas 20.15, casa da scola Crestas, Ruschein. Dapli sin www.dacuminonza.ch